



欽定四庫全書

集部

別集類三十四家

133

12  
130  
90

九十





1157  
1330  
90



欽定四庫全書總目卷一百六十

集部十三

別集類十三

乾道彙一卷 淳熙彙二十卷 章泉彙五卷

永樂大典本

宋趙蕃撰蕃字昌父號章泉先世鄭州人建炎初其會祖賜官於信州因家焉蕃以賜致仕恩補官後終於直祕閣蕃始受學劉清之年至五十乃問學於朱子朱子文集與蕃尺牘凡六首蕃與朱子往還詩及他作之稱述朱子者二十餘首朱子答

欽定四庫全書總目卷一百六十

集部 別集類十三

所錢文  
有恂那



徐斯遠書有云昌父志操文詞皆非流輩所及且欲其刊落枝葉就日用閒深察義理之本然庶幾有所據依以造實地不但爲騷人墨客而已所以援引之者甚力然蕃本詞人晚乃講學其究也仍以詩傳與澗泉韓滉有二泉先生之稱滉集久佚今從永樂大典哀輯已別著錄蕃集世亦無傳而永樂大典所收頗富并爲採掇編次依舊本標題釐爲乾道彙一卷淳熙彙二十卷章泉彙五卷共二十六卷而以蕃本傳及劉宰所作墓表附錄於

後初蕃爲太和簿時受知於楊萬里萬里贈詩有云西昌主簿如禪僧日餐秋菊嚼春冰又云勸渠未要思舊隱且與西昌作好春又贊其寫真云貌恭氣和無月下推敲之勢神清骨聳非山頭瘦苦之容一笑詩成萬象春風劉克莊跋亦云近歲詩人惟趙章泉五言有陶阮意詩人玉屑載蕃論詩一則以陳后山寄外舅詩爲全篇之似杜者後戴式之思家用陳韻又全篇之似陳者觀其持論其詩學淵源亦可概見矣又張端義貴耳集稱蕃與



周必大同里必大當軸所任但一酒官五十年不  
調案五十年疑當為十五年之譌壽九十餘公朝尊老以祕閣正  
郎聘之不至則蕃之恬淡自守人品本高宜其詩  
之無俗韻也

雙溪集二十七卷

兩淮馬裕家藏本

宋王炎撰炎字晦叔婺源人乾道五年進士官至  
軍器少監與淳熙中觀文殿大學士王炎名姓偶  
同非一人也所著有讀易筆記尚書小傳禮記論  
語孝經老子解春秋衍義象數稽疑禹貢辨考工

記鄉飲酒義諸經考疑編年通紀紀年提要天對  
解韓柳辨證傷寒論總題曰雙溪類稿今已無傳  
惟詩文集僅存世所行者凡二本一本為康熙中  
其族孫祺等所刊凡十二卷一卽此本乃明萬歷  
丙申尚寶司丞王鏐得沈一貫家舊本為校正開  
雕者也凡賦樂府一卷詩詞九卷文十七卷炎初  
與朱子相契朱子集中和炎寄弟詩有祇今心事  
同千里靜對簞瓢獨喟然之句炎亦多與朱子往  
還之作其交誼頗篤及朱子為待制侍經筵甯宗



方諒闇擇日開講炎貽書朱子論其非禮而朱子集中無答書蓋是時韓侂胄趙汝愚覺隙方開汝愚援道學諸人以自助語詳齊東野語侂胄之黨眈眈側目朱子急欲甯宗親近士大夫故不拘喪禮汲汲以講學爲先實一時權宜之計迨一經攻駁難以置詞遂付之於不論豈非所持者正雖朱子亦不能與之爭歟其詩文博雅精深亦具有根柢程敏政輯新安文獻志所採最多其所未採諸篇議論醇正引據典確者尙不可悉數蓋學有本原則詞

無鄙誕較以語錄爲詩文者固有蹈空徵實之別矣

止堂集二十卷

永樂大典本

宋彭龜年撰龜年字子壽清江人乾道五年進士歷官煥章閣待制知江陵府遷湖北安撫使坐事落職尋復官以寶謨閣待制致仕卒諡忠肅事蹟具宋史本傳龜年官右史時面折廷諍劇切人主有古直臣之風集中所存奏疏劄子尙五十五篇敷陳明確多關於國家大計其論光宗不朝重華



宮疏凡三四上至於伏地叩額血漬鬢光宗亦爲之感動又嘗事甯宗於藩邸有舊學之恩卽位後數進讜言拳拳懇到因風雷示變極陳小人之竊權及朱子以論韓侂胄被絀龜年又上疏請與同斥今諸疏竝在集中其嚴氣正性凜然猶可想見史稱其學識正大議論簡直善惡是非辨析甚嚴故生平雖不以文章名而懇惻之忱與剛勁之氣浩然直達語不求工而自工固非輦悅爲文者所得絜其長短也宋史藝文志載其集四十七卷

世久失傳今從永樂大典所載益以歷代名臣奏議所錄共得文二百二十三首詩二百二十首依類編次釐爲二十卷雖得諸殘闕之餘而其一生建白史所未盡載者已略具於是傳龜年之文益足傳龜年之人矣

緣督集二十卷

永樂大典本

宋曾丰撰丰字幼度樂安人乾道五年進士官至知德慶府事真德秀幼嘗受學於丰及執政奏取其集入崇文四部當時嘗版行於世歲久不傳元



元統閒丰五世孫德安購其遺集得四十卷翰林  
學士虞集爲之敘謂其氣剛而義嚴辭直而理勝  
有得於易之奇詩之葩其文今見道園學古錄中  
然當時欲授梓不果至明嘉靖閒詹事講始選錄  
十有二卷刻於宣城卷末有萬銜後序稱摘其尤  
者存之今觀所分諸體如五言排律類中惟有排  
律一二首餘皆五言古詩七言排律類中皆七言  
古詩無一首爲律是古今體且不能辨其去取乖  
謬大概可知蓋事講從羅洪先游日以討論心學

爲事文章一道非所深研遂使丰之菁華反因此  
選而散佚殊堪惋惜惟永樂大典編自明初尙見  
丰之原集其所收錄較刊本多至數倍今據以增  
補乃哀然幾還舊觀佚而復存亦云幸矣丰仕蹟  
不顯頗以著述自負集中如六經論之類根柢深  
邃得馬鄭諸儒所未發其他詩文雖閒有好奇之  
癖要皆有物之言非膚淺者所可企及亦南宋一  
作者也丰晚年築室自號曰樽齋故是編一名樽  
齋集見於宋史藝文志今從虞集所序仍以緣督



爲名集序稱凡四十卷而宋志乃作十四卷蓋刊刻傳寫誤倒其文今原目不可復睹謹據所存各體以類區分共釐爲二十卷

象山集二十八卷外集四卷附語錄四卷

大理寺卿陸錫熊家藏本

宋陸九淵撰九淵字子靜金谿人乾道八年進士紹熙初官至奉議郎知荆門軍卒於官事蹟具宋史本傳據九淵年譜集爲其子持之所編其門人袁燮刊於江西提舉倉司者凡三十二卷宋史藝文志文獻通考竝作象山集二十八卷外集四卷

總而計之與燮所刊本卷數相符獨年譜稱持之所編外集爲六卷殆傳寫譌四爲六歟此本前有燮序又有楊簡序燮序作於嘉定五年簡序作於開禧元年在燮序前七年而列於燮後蓋刊版之時以新序弁首故翻刻者仍之又有嘉定庚辰吳杰跋稱是集爲建安陳氏所刊而年譜未載此本豈持之偶未見歟前十七卷爲書十八卷爲表奏十九卷爲記二十卷爲序贈二十一卷至二十四卷爲雜著二十五卷爲詩二十六卷爲祭文二十



七卷二十八卷為墓誌墓碣墓表外集四卷皆程  
試之文末為諡議行狀則吳杰所續入也其語錄  
四卷本於集外別行正德辛巳撫州守李茂元重  
刻是集乃并附集末以成陸氏全書其說與集中  
論學諸書互相發明合而觀之益足勘證今亦仍  
附於末不別著錄焉

慈湖遺書十八卷續集二卷

編修汪如藻家藏本

宋楊簡撰簡有慈湖易傳已著錄金谿之學以簡  
為大宗所為文章大抵敷暢其師說其講學純入

於禪先儒論之詳矣其論治務最急者五事次急  
者八事大抵欲罷科舉以復鄉舉里選限民田以  
復井田皆迂闊不達時勢然簡歷官治績乃多有  
可紀又非膠固鮮通者蓋簡本明練政體亦知三  
代之制至後世必不可行又逆知雖持是說以告  
世世亦必不冝用不慮其試之而不驗故姑為高  
論以自表其異於俗學霸術而已及其莅官臨事  
利弊可驗而知者則固隨地制宜不敢操是術以  
治之故又未嘗無實效也宋史本傳載簡所著有



甲彙乙彙冠記昏記喪禮家記祭祀釋菜禮記石  
魚家記及已易啟蔽諸書其目甚多陳振孫書錄  
解題則稱簡遺書止三卷此本自六卷以前爲雜  
文及詩七卷至十六卷爲家記皆雜錄論經史治  
道之說如語錄之體十七卷紀先訓十八卷乃錢  
時行狀及真德秀跋又編雜文一卷及孔子閒居  
解一卷於後謂之續集與振孫所記卷數多寡不  
合而集中家記內各條又有別標曰見遺書者疑  
先有遺書三卷初本別行後又哀輯諸編共成此

集仍總以遺書名之猶之王質雪山集有三卷之  
本有四十卷之本歟

絜齋集二十四卷

永樂大典本

宋袁燮撰燮有絜齋家塾書鈔已著錄乾道紹熙  
之間陸九淵以心學倡一世燮初與同里沈煥楊  
簡舒璘同師事之均號金谿高弟猶程門之稱游  
楊呂謝也簡與璘各有全集流傳於後煥之著述  
久已不存今亦無從蒐輯惟燮絜齋集二十六卷  
後集十三卷見於書錄解題者明初尙有其本故



永樂大典採掇頗多厥後遂罕相傳錄漸就散亡  
卽祖述象山之派者亦不能舉其篇目矣今據永  
樂大典所載哀集編次得文二百四十八首詩一  
百七十六首大抵澹樸質直不事雕繪而真氣流  
溢頗近自然其剖析義理敷陳利病凡議論爲語  
錄所未採事迹爲史傳所未詳者亦多足證焉固  
不徒以文章貴也惟永樂大典於前後二集不各  
爲標識今遂無可辨別謹以類排纂并爲一集勒  
成二十四卷而以燮子甫所作序一篇附之用存

其舊云

舒文靖集二卷

浙江汪啟淑家藏本

宋舒璘撰璘字元質一字元賓奉化人舉乾道八  
年進士初授徽州教授擢知平陽縣終宜州通判  
淳祐中追諡文靖事蹟具宋史儒林傳璘棲遲州  
縣終身未一挂朝籍故集中無章奏之文其經略  
遂不可考見本傳亦但稱其教授新安作詩禮講  
解家傳人習自是其學浸盛然觀集中與陳倉劄  
子論常平義倉茶鹽保長之法深切時弊皆其教



授新安時所作則璘亦非短於經世者也本傳稱璘釋褐之後兩除郡教授不就未著其所除者何郡今觀璘自作其父壙銘篇末有曰子璘迪功郎信州州學教授則是所稱兩郡之一而本傳失之者又本傳稱璘爲徽州學官司業汪達首欲薦璘或謂舉員已足達曰吾職當舉教官舍斯人將誰先卒剡薦之今集中有申謝傅漕及張守陳倉三人薦舉劄子又有謝李提舉書乃獨不及達其與樓大防書云前張守所惠薦章蒙示回簡方知所

自與王大卿書亦云荷禮書九丈漕使傅文倉使陳丈惠然相舉皆出提獎之賜亦均不及達與本傳亦復互異道學儒林兩傳爲修宋史者所最留意而參考斯集已舛漏如是是亦足證托克托等之疎謬矣

雲莊集十二卷

浙江巡撫採進本

宋劉燾撰燾有四書問目已著錄燾與弟炳均游朱子之門故嘗上疏乞開僞學之禁爲宋史本傳所採然其上史彌遠書論用人聽言之道及宋史



載其奏便民五事論貢舉五弊諸疏尤爲有用之言今書載集中而五事五弊疏集無其文則所闕佚不少矣是集爲祁承燾澹生堂鈔本前有嘉定閒李埴序又附真德秀碑文乃明天順閒其十世孫梗所編又別一本爲其十世孫穩所重刻較梗所編少文數首亦不載德秀碑文穩序稱朱子晚年以書屬蔡沈以禮屬燾又稱燾精力在王朝禮編而雜著之文略見於此案朱子以儀禮喪祭二門屬黃幹未嘗屬燾宋史燾本傳既不載此語而

王朝禮編亦未見其書不知何所據而云然殆與世傳四書問目同一在疑似之間歟

定齋集二十卷

永樂大典本

宋蔡戡撰戡字定夫其先興化軍仙遊人端明殿學士襄之四世孫也祖紳紹興中官左中大夫始寓常州武進縣戡幼承門蔭補溧陽尉後中乾道丙戌進士甲科官至寶謨閣直學士宋史不爲立傳故其行事不概見凌迪知萬姓統譜載戡持節五羊代輸敷銀民甚便之爲湖南憲有定亂功爲



京兆尹歲滂糴艱亟請發廩民賴以濟其敘述頗  
詳然案集中諸表啟則又嘗任京西運判廣東運  
判湖北總領廣西經略淮西總領等官其乞致仕  
劄子及效白樂天自詠詩中亦頗見其概而迪知  
均未之及蓋其集久佚不傳故迪知莫能考也集  
本四十卷乃紹定三年其季子戶部郎官總領四  
川財賦廩所刊眉山李埴爲序見於陳振孫書錄  
解題今據永樂大典所載者蒐採彙集竝集歷代  
名臣奏議得所未載者二十篇互相訂正釐爲二

十卷較諸原目十殆得其五矣埴序稱戡鯁挺不  
阿屢更繁劇宣力四方無不殫盡汔以全節始終  
今觀集中所上奏劄條列明確類皆侃直忠亮爲  
經世有用之言其論邊事專以嚴備自守爲主而  
不汲汲於和戰紛爭遠慮深謀亦非好事偷安者  
所可幾及方之同時名臣實龔茂良之流亞惜史  
不備載其生平幾至湮沒今幸遺集復彰尙得  
以考見大略謹芻採紀傳於人名事實有可稽核  
者悉爲參互證明庶以補宋史之闕漏焉



九華集二十五卷附錄一卷

永樂大典本

宋員興宗撰興宗有采石戰勝錄已著錄其集見於焦竑國史經籍志者本五十卷乃寶慶三年其孫榮祖所編興宗弟夢協并研李心傳俱爲之序明以來久佚不存今檢勘永樂大典所錄摭拾詮次釐爲詩六卷雜文十五卷又論語解老子解略西陲筆略併紹興采石大戰始末各一卷而原集所載同時祭文可以互證興宗始末者則別爲一卷附之於後集中多與張栻陸九淵往復書簡蓋

亦講學之家然所上奏議大抵毅然抗論指陳時弊多引繩批根之言李心傳序謂歸附既畱而垂遣誓御因逐而旋召均輸久廢而驟復此三事皆朝廷所必行而興宗矢筆盡言斥逐不悔則其經濟氣節均有實事非徒侈空談者矣又洪适撰隸釋時嘗咨以漢碑數字興宗爲之考核源委具見精博今荅書一通具在集中學問淹雅亦未易及雖其文力追韓柳不無錘鍊過甚之弊然骨力峭勁要無南渡以後冗長蕪蔓之習亦一作者也



野處類豪二卷

編修汪如藻家藏本

宋洪邁撰邁有容齋隨筆已著錄宋史藝文志載邁野處猥豪一百四卷瓊野錄三卷而陳振孫書錄解題祇載有此集二卷且云前集未見則當時傳播已稀觀馬端臨經籍考以別集詩集分類而收此豪於別集中不知其爲詩集則亦未見其本而循名誤載者矣惟內閣書目有野處內外集九冊不著卷數當卽猥豪之殘本今亦未見有傳錄者世所行邁集獨有此本而已集前有邁自序稱

甲戌之春家居臥病作詩若干首以自當緩憂之一物遂取曩時所存而未棄者錄爲二卷甲戌爲高宗紹興二十四年蓋邁退居鄱陽時所作而集中謁普照塔詩又有庚戌紀年當在建炎三年相去已二十四五歲僅得詩八十餘首又容齋三筆紀紹興十九年在福建貢院與葉晦叔所作詩正在甲戌之前而集中竝未載疑本就篋笥所貯偶然哀輯故所錄闕略如此然其生平韻語惟藉此以考見大概則零珪斷璧未嘗不足珍惜也



盤洲集八十卷

浙江巡撫  
採進本

宋洪适撰适有隸釋已著錄許及之撰适行狀稱有文集一百卷藏於家周必大撰适神道碑則稱其論著爲四方傳誦有盤洲集八十卷與行狀互異考陳振孫書錄解題張萱重編內閣書目俱作八十卷則及之所稱其家藏之舊槧必大所稱乃其行世之刊本其書流傳頗尠王士禎居易錄謂朱彝尊所藏盤洲集僅有其詩則藏書家已罕覩全帙此本爲毛氏汲古閣所藏猶從宋刻影寫惟

末卷拾遺劄子第三篇蠹損特甚其餘雖字句間有脫落而卷帙完好亦古本之僅存者矣适以詞科起家工於儷偶其弟邁嘗舉所草張浚免相制王大寶致仕制浙東謝表生日詩詞謝啟諸聯載於容齋三筆然考适自撰小傳自其少時擬復得河南賀表卽有齊人歸鄆謹之田宣王復文武之境句爲作者所稱其內外諸制亦皆長於潤色藻思綺句層見疊出不但如邁之所舉也至於記序誌傳之文亦尙存元祐之法度尤南宋之錚錚者



矣所作隸釋隸續於史傳舛異考核特精今觀此集加跋唐瑾傳跋丹州刺史碑跋皇甫誕碑諸篇皆能援據舊刻訂北史唐書之謬蓋金石之學最所留意卽隋唐碑誌亦多能辨證異聞又宋史本傳稱其父皓謫英州迨往來嶺南省侍者九載檜死皓還服闋起知荆門州軍今以集中自撰小傳及皓行述考之則皓安置英州居九年始復朝請即徙袁州至南雄州卒後一日秦檜亦死非檜死而皓始還足訂宋史之誤其他表啟疏狀諸篇亦多

足與宋史參稽是又不僅取其文詞之工矣

應齋雜著六卷

永樂大典本

宋趙善括撰善括宋史無傳惟宗室表載此名爲太宗第四子商王元份六代孫考集中有趙運幹墓誌銘稱同姓兄可大藝祖七世孫與宗室表世次相合蓋卽其人然表亦不詳其爵里今案集中返黃樞密知隆興府啟有一廬爲岷應修桑梓之敬語則籍隸隆興祭漢陽趙守文有仙源同盟鴈塔俱第語則嘗登進士得常熟宰謝政府啟有奮



身科第千載之遇語則釋褐爲常熟令平江罷倅  
青詞有字邑罔功叨陞郡佐語賀趙樞密啟有贊  
員別駕叨祿京畿語又有長沙倅署磬沼詩則由  
縣令倅三郡與湖北張安撫啟有叨把一麾深慚  
共理語又有鄂州上殿三劄子則由郡倅知鄂州  
謝宰執啟有方懷溝壑之虞遽增幕府之數語謝  
湖南師啟有四十年低徊州縣三萬里奔走塵埃  
語則在滿閒居復充幕職又有次計幕諸友韻詩  
謝岳漕啟則終於岳州漕帥佐也是集宋志不載

其原本卷帙不可考今以永樂大典所載哀爲六  
卷宋人奏議多浮文妨要動至萬言往往晦蝕其  
本意善括所上諸劄率簡潔切當得論事之要如  
論紛更之弊糾賞罰之失皆深中時弊而永樂中  
修歷代名臣奏議乃不載其一字未明何故詩詞  
多與洪邁章甫唱和而與辛棄疾酬贈尤多其詞  
氣駿邁亦復相似觀其金陵有感詩有謝安王導  
亦可罪至今遂使南北分句其不滿於湖山歌舞  
文恬武嬉意趣蓋與棄疾等固宜其相契也



芸菴類彙六卷

永樂大典本

宋李洪撰洪姓名不著於史諸家書目亦未載有是集惟永樂大典頗散見其文又別出陳貴謙原序一篇稱洪爲李正民之子又稱爲藤州使君知洪官止知藤州集中又有扈從朝德壽宮景靈宮詩則嘗爲京朝官有在溫州題其父手澤詩稱嗣子守官於此則曾知溫州其他則不可復考矣正民本揚州人南渡後僑寓海鹽故洪集中如烏龍井廟迎送神詞之類皆在海鹽所作而卜居飛英

坊一首乃云束書辭都門整棹還苕川則洪後又移居湖州乃兩郡紀流寓者俱不及其父子則由遺集散佚徵文獻者弗及也洪所作詩雖骨幹未堅而神思清超時露警秀七言律詩尤爲工穩足以嗣響止民陳貴謙序稱原本二十卷而今所掇拾僅得詩詞三百九十餘首文三十首視原集祇十之三四謹據所存者釐爲五卷而以雜文一卷附之略具梗概俾不致終就泯沒焉

浪語集三十五卷

兩淮馬裕家藏本

欽定四庫全書

集部 別集類十三



宋薛季宣撰季宣有書古文訓已著錄季宣少師  
事袁溉傳河南程氏之學晚復與朱子呂祖謙等  
相往來多所商榷然朱子喜談心性而季宣則兼  
重事功所見微異其後陳傅良葉適等遞相祖述  
而永嘉之學遂別爲一派蓋周行已開其源而季  
宣導其流也其歷官所至調輯兵民興除利弊皆  
灼有成績在講學之家可稱有體有用者矣平生  
著書甚夥有古文周易古詩說書古文訓春秋經  
解春秋指要論語直解小學諸書自書古文訓以

外今多亡佚其中庸大學解及考正握奇經則今  
尚載於集中蓋季宣學問最爲淹雅自六經諸史  
天官地理兵農樂律鄉遂司馬之法以至於隱書  
小說名物象數之細靡不搜採研貫故其持論明  
晰考古詳核不必依傍儒先餘緒而立說精確卓  
然自成一家於詩則頗工七言極踔厲縱橫之致  
惜其年止四十得壽不永又覃思考證不甚專心  
於詞翰故遺藁止此然卽所存者觀之其精深閎  
肆已足陵跨餘子矣其集乃寶慶二年其姪孫知



府州事且所編次刊行且所作後序尚存而自明  
以來刻本遂絕藏書家輾轉傳鈔譌脫頗甚謹重  
為校正而卷帙則悉仍其舊焉

石湖詩集三十四卷

江蘇巡撫  
探進本

宋范成大撰成大有吳郡志已著錄案陳振孫書  
錄解題成大有集一百三十六卷宋史藝文志亦  
載石湖大全集一百三十六卷與陳氏著錄同而  
又有石湖別集二十九卷又有石湖居士文集亡  
其卷數此本為長洲顧嗣立等所訂乃於全集之

中獨摘其詩別行而附以賦一卷前有楊萬里陸  
游二序然萬里所序者乃其全集不專序詩游所  
序者乃其西征小集亦非序全詩以名人之筆嗣  
立等姑取以弁首耳據萬里序集乃成大所自編  
考十一卷末有自註云以下十五首三十年前所  
作續得殘藁附此卷末其餘諸詩亦皆註以下某  
處作是亦手訂之明證矣詩不分體亦不分立名  
目惟編年為次然送洪邁使金詩凡四首其兩首  
在第八卷列於邁使還入境以詩迓之之前其兩



首乃在第十卷列於何溥挽詞之後邁未嘗再使  
金則送別之詩不應前後兩見又南徐道中詩下  
註曰以下赴金陵漕試作則是當在第二卷之首  
不應孤贅第一卷之末或後人亦有所竄亂割併  
歟成大在南宋中葉與尤袤楊萬里陸游齊名表  
集久佚今所傳者僅尤侗所輯之一卷篇什寥寥  
未足定其優劣今以楊陸二集相較其才調之健  
不及萬里而亦無萬里之麤豪氣象之闊不及游  
而亦無游之窠臼初年吟詠實沿溯中唐以下觀

第三卷夜宴曲下註曰以下二首效李賀樂神曲  
下註曰以下四首效王建已明明言之其他如西  
江有單鵠行河豚嘆則雜長慶之體嘲里人新婚  
詩春晚三首隆師四圖諸作則全爲晚唐五代之  
音其門徑皆可覆案自官新安掾以後骨力乃以  
漸而邁蓋追溯蘇黃遺法而約以婉峭自爲一家  
伯仲於楊陸之間固亦宜也

誠齋集一百三十二卷

編修汪如藻家藏本

宋楊萬里撰萬里有誠齋易傳已著錄此集則嘉



金定四庫全書總目卷一百一十一  
定元年其子長孺所編也萬里立朝多大節若乞  
留張栻力爭呂頤浩等配享及裁變應詔諸奏今  
具載集中丰采猶可想見然其生平乃特以詩擅  
名有江湖集七卷荆溪集五卷西歸集二卷南海  
集四卷朝天集六卷江西道院集二卷朝天續集  
四卷江東集五卷退休集七卷今併在集中方回  
瀛奎律髓稱其一官一集每集必變一格雖沿江  
西詩派之末流不免有頹唐靡俚之處而才思健  
拔包孕富有自爲南宋一作手非後來四靈江湖

諸派可得而竝稱周必大嘗跋其詩曰誠齋大篇  
短章七步而成一字不改皆掃千軍倒三峽穿天  
心出月脅之語至於狀物姿態寫人情意則鋪敘  
纖悉曲盡其妙筆端有口句中有眼云云是亦細  
大不捐雅俗竝陳之一證也南宋詩集傳於今者  
惟萬里及陸游最富游晚年墮節爲韓侂胄作南  
園記得除從官萬里寄詩規之有不應李杜翻鯨  
海更羨夔龍集鳳池句羅大經鶴林玉露嘗記其  
事以詩品論萬里不及游之鍛鍊工細以人品論



則萬里倜乎遠矣其集卷帙繁重久無刻版故傳  
寫往往譌脫考岳珂程史記朝天續集韓信廟詩  
淮陰未必滅文成句麻沙刻本譌文成爲宣成則  
當時已多誤本今核正其可考者凡疑不能明者  
則姑闕焉

劔南詩彙八十五卷

內府藏本

宋陸游撰游有入蜀記已著錄是集未有嘉定十  
三年游子朝請大夫知江州軍事子虞跋稱游西  
泝夔道樂其風土有終焉之志宿留殆十載戊戌

春正月孝宗念其久外趣召東下然心未嘗一日  
忘蜀也是以題其平生所爲詩卷曰劔南詩彙蓋  
不獨謂蜀道所賦詩也又稱戊申己酉後詩游自  
大蓬謝事歸山陰故廬命子虞編次爲四十卷復  
題其籤曰劔南詩續彙自此至捐館舍通前彙爲  
詩八十五卷子虞假守九江刊之郡齋遂名曰劔  
南詩彙案遂字文義未順疑當作通名曰劔南詩彙云云則此本游子  
虞之所編至跋稱游在新定時所編前彙於舊詩  
多所去取所遺詩尙七卷不敢復雜之卷首別其



名曰遺藁者案後村詩話作別集七卷蓋偶筆誤今則不可見矣卷首又有淳熙十四年游門人鄭師尹序稱其詩爲眉山蘇林所收拾而師尹編次之與子虞跋不同蓋師尹所編先別有一本子虞存其舊序冠於全集也游詩法傳自曾幾而所作呂居仁集序又稱源出居仁二人皆江西派也然游詩清新刻露而出以圓潤實能自闢一宗不襲黃陳之舊格劉克莊號爲工詩而後村詩話載游詩僅摘其對偶之工已爲皮相後人選其詩者又略其感激豪宕沈鬱

深婉之作惟取其流連光景可以剽竊移掇者轉相販鬻放翁詩派遂爲論者口實夫游之才情繁富觸手成吟利鈍互陳誠所不免故朱彝尊曝書亭集有是集跋摘其自相蹈襲者至一百四十餘聯是陳因窠臼游且不能自免何況後來然其託興深微遣詞雅雋者全集之內指不勝屈安可以選者之誤併集矢於作者哉今錄其全集庶幾知劔南一派自有其真非淺學者所可藉口焉

渭南文集五十卷逸藁二卷

內府藏本

次定回車金書總目卷一百六十一

集部 別集類十三

三五



宋陸游撰游晚封渭南伯故以名集陳振孫書錄  
解題作三十卷此本爲毛氏汲古閣以無錫華氏  
活字版本重刊凡表牋二卷劄子二卷奏狀一卷  
啓七卷書一卷序二卷碑一卷記五卷雜文十卷  
墓誌墓表壙記塔銘九卷祭文哀辭二卷天彭牡  
丹譜致語共爲一卷入蜀記六卷詞二卷共五十  
卷與陳氏所載不同疑三字五字筆畫相近而譌  
刻也未有嘉定三年游子承事郎知建康府溧陽  
縣主管勸農事子適跋稱先太史未病時故已編

輯凡命名及次第之旨皆出遺意今不敢紊又述  
游之言曰劔南乃詩家事不可施於文故別名渭  
南如入蜀記牡丹譜樂府詞本當別行而異時或  
至失散宜用廬陵所刊歐陽公集例附於集後云  
云則此集雖子適所刊實游所自定也游以詩名  
一代而文不甚著集中諸作邊幅頗狹然元祐黨  
家世承文獻遺詞命意尚有北宋典型故根柢不  
必其深厚而修潔有餘波瀾不必其壯闊而尺寸  
不失士龍清省庶乎近之較南渡末流以鄙俚爲



真切以庸沓爲詳盡者有雲泥之別矣游劔南詩  
橐有文章詩曰文章本天成妙手偶得之粹然無  
瑕疵豈復須人爲君看古彝器巧拙兩無施漢最  
近先秦固已殊滔滔其文固未能及是其旨趣則  
可以概見也逸橐二卷爲毛晉所補輯史稱游晚  
年再出爲韓侂胄撰南園閣古泉記見譏清議今  
集中凡與侂胄啓皆諱其姓但稱曰丞相亦不載  
此二記惟葉紹翁四朝聞見錄有其全文晉爲收  
入逸橐蓋非游之本志然足見愧詞曲筆雖自刊

除而流傳記載有求其泯沒而不得者是亦足以  
爲戒矣

放翁詩選前集十卷後集八卷附別集一卷

兵部侍郎  
紀昀家藏

宋羅椅劉辰翁所選陸游詩也前集椅所選元大  
德辛丑其孫懋始刻之前有懋自序後集辰翁所  
選前後無序跋椅閒有圈點而無評論辰翁則句  
下及篇末頗有附批大致與所評杜甫王維李賀  
諸集相似明人刻辰翁評書九種是編不在其中



蓋偶未見此本詳其詞意確爲須溪門徑非僞託也未有明人重刻舊跋蠹蝕斷爛幾不可讀并作者姓名亦莫辨其可辨者惟稱宏治某年得於餘杭學究家屬其同年餘杭知縣冉孝隆校刻之耳又稱放翁集鈔本尙存然聞而未嘗見獨羅澗谷劉須溪所選在勝國時書肆嘗合而梓行以故轉相鈔錄迄今漸出而印本則見亦罕矣云云據其所言則兩人本各自爲選其前集後集之目蓋元時坊賈所追題矣跋又有複者去之之語故兩集

所錄無一首重見末附爲別集一卷不題編纂名氏其詩皆見瀛奎律髓中以跋中取方虛谷句推之知卽作跋者所緝以補二集之遺其中睡起至園中一首已見前集五卷中蓋偶誤也劔南詩集汲古閣刻本今已盛行於世然此選去取頗不苟又宋人舊本故以陳亮歐陽文粹之例與本集竝存之椅字子遠號澗谷廬陵人寶祐四年進士以秉義郎爲江陵教官改漳州復知贛州信豐縣遷提轄權貨德祐初遭論罷周密齊東野語記其當



道學盛時依託求進道學勢衰之後遂棄去不相  
聞問深不滿之明偶桓乾坤清氣集皆錄元人之  
詩而有謝幼輿折齒歌一首蓋元初尙存辰翁自  
有集始末詳見本條下

金陵百詠一卷

浙江鮑士恭家藏本

宋曾極撰極字景建臨川布衣晚以江湖集事得  
罪謫道州卒所著春陵小雅今已不傳此乃其詠  
建康故蹟之作皆七言絕句凡一百首詞旨悲壯  
有磊落不羈之氣羅椅嘗謝其惠百詠書云不知

景建是何肺腑能辦此等惱人語於千載下今觀  
其詩如天門山云高屋建瓴無計取二梁剛把當  
殺面新亭云江右於今成樂土新亭垂淚亦無人  
大抵皆以南渡君臣畫江自守無志中原而作其  
寓意頗爲深遠豫章人物志載極遊金陵題行宮  
龍屏忤時相史彌遠以是獲譴是編有古龍屏風  
一首云乘雲遊霧過江東繪事當年笑葉公可恨  
橫空千丈勢剪裁今入小屏風與人物志所紀相  
合蓋其憤激之詞雖不無過於徑直而淋漓感慨



與劉過龍洲集中詩句氣格往往相同固不徒以  
模山範水爲工者也劉壘隱居通議摘其可惜當  
年殺嚴續無人爲益決囚燈二語謂續始終全美  
未嘗被殺不免誤用故事考資治通鑑載陳覺使  
周還矯世宗詔命李景殺嚴續景表請於周明續  
無罪覺詐始露而續得免是續實未被殺壘所駁  
良是究其致謬之由蓋以姚寬西溪叢語有鍾謨  
奉使歸唐以陳覺矯周帝之命斬嚴續事言於唐  
上云云所言不具首尾極遂以爲實有是事又決

囚燈事以中主誤爲後主亦爲乖舛是則考證之  
偶疎固不必爲之諱矣

頤菴居士集二卷

江蘇巡撫  
採進本

宋劉應時撰應時字良佐四明人是集前有陸游  
楊萬里二序游序稱其詩爲范致能所賞又摘其  
句如頗識造物意長容吾輩閒日晏猶便睡犬鳴  
知有人世事不復問舊書時一看一夜催花雨數  
家臨水村青山空解供望眼濁酒不能澆別愁覓  
句忍飢貧亦樂鈔書得味老何傷以爲卓然自得



雖前輩以詩得名者亦無以加萬里序以王安石擬之安石詩雖鎔鍊有痕不及蘇黃諸人吐言天拔而根柢深厚氣象自殊究非應時之所及許之未免太過所摘之句如睡魔正與詩魔戰窗外一聲婆餅焦之類頗涉麤獷獨與梅花共過冬清月又移疎影去之類又頗近詩餘亦不逮游序所舉之工蓋二人各舉其派之近己者稱之也然應時詩雖格力稍薄不能與游等竝駕而往來於諸人之閒耳孺目染終有典型較宋末江湖諸人固居

然雅音矣

水心集二十九卷

編修朱筠家藏本

宋葉適撰適有習學記言已著錄其文集之目見於陳振孫書錄解題趙希弁讀書附志者皆二十八卷又有拾遺一卷別集十六卷則獨載於書錄解題且稱淮東本無拾遺編次亦不同別集前九卷爲制集進卷後六卷號外橐皆論時事末卷號總集專論買田贍兵讀書附志則但紀其集爲門人趙汝鐳序刻而不詳其體例此本爲明正統



中處州推官黎諒所編前有自識稱少讀通策場  
標準慕其文至括郡訪求八年得劄狀奏議等八  
百餘篇因哀輯彙次合爲一編蓋已非宋本之舊  
惟趙汝鑑原序尙存然汝鑑實用編年之法諒不  
加深考以意排纂遂至盡失其原次其閒如財總  
論田計諸篇多論時事當卽別集佚篇不在原集  
二十八卷之內諒亦不能辨別也適文章雄贍才  
氣奔逸在南渡卓然爲一大宗其碑版之作簡質  
厚重尤可追配作者適嘗自言譬如人家觴客雖

或金銀器照座然不免出於假借惟自家羅列者  
卽僅甃缶瓦杯然都是自家物色其命意如此故  
能脫化町畦獨運杼軸韓愈所謂文必已出者殆  
於無忝吳子良荆溪林下偶談稱水心作汪勃墓  
誌有云佐佑執政共持國論執政乃秦檜同時者  
汪之孫綱不樂請改水心荅書不從會水心卒趙  
蹈中方刊文集未就門下有受汪囑者竟爲除去  
佐佑執政四字今考集中汪勃誌文已改爲居紀  
綱地共持國論則子良所紀爲足信而適作文之



不苟亦可以概見矣

南湖集十卷

永樂大典本

宋張鑑撰鑑有仕學規範已著錄葉紹翁四朝聞見錄稱甯宗誅韓侂胄鑑預其謀史彌遠以韓大臣近戚未有以處鑑曰殺之足矣史曰真將種也因心忌之及侂胄既誅鑑齋伎自言史謂不當居功諷言者貶鑑於霅後以旨放還周密齊東野語癸辛雜識又稱鑑本善侂胄被誅前一日爲其愛妾生日鑑猶攜庖夜宴故侂胄不疑及賞不滿意

復欲以故智去史事泄謫象臺而卒據二書所云是鑑本以機數立功名有忍鷲之才而心術未爲純正密作武林舊事又稱鑑卜築南湖名其軒曰桂隱園池聲伎服玩之麗甲於天下園中亭榭堂宇名目數十且排纂一歲中游適之目爲賞心樂事是其席祖父富貴之餘湖山歌舞極意奢華亦未免過於豪縱然其詩學則頗爲精深趙與峩娛書堂詩話稱其游意風雅與誠齋放翁唱和詩多佳句載其晚晴絕句二首題六合寺五言律詩一



首楊萬里誠齋詩話謂其寫物之工絕似晚唐又有寄張功甫姜堯章詩云九蕭范陸四詩翁此後誰當第一功新拜南湖爲上將更差白石作先鋒其意直躋諸姜夔之右矣其集久佚不傳楊士奇文淵閣書目雖載有張約齋南湖集一部五冊藏弄家亦皆未見今檢永樂大典各韻中收入鎡詩尙多評其格律大都清新獨造於蕭散之中時見雋永之趣以視嘈雜者流可謂翛然自遠詩固有不似其人者鎡之謂歟又工長短句有玉照堂詞選本多見採錄而原本亦久散佚謹衷集編次以類相從釐爲詩九卷詞一卷用存其略永樂大典所載多題曰湖南集以諸書參考知爲傳寫之誤今亦竝從改正焉

南澗甲乙藁二十二卷

永樂大典本

宋韓元吉撰元吉有桐陰舊話已著錄案陳振孫書錄解題稱爲門下侍郎韓維元孫江西通志則以爲韓維之子考宋史維本傳稱卒於元符元年而集中南劍道中詩註稱其生於戊戌至甲子年



二十七戊戌爲徽宗重和元年上距元符元年戊寅凡二十年安得爲維之子集中又有高祖宮師文編序稱紹聖中公謫均州又稱建中靖國以來追復原官與維事迹一一相符知江西通志爲誤當以陳氏爲是矣陳氏又稱其初與從兄元龍皆試詞科不利後官至吏部尙書而不詳其事蹟今據其赴信幕詩知初爲幕僚據其送連必達序知嘗爲南劔州主簿據其凌風亭題名知嘗知建安縣據其謝表狀劄知在外嘗爲江東轉運判官兩

知婺州又知建甯府在內嘗權中書舍人守大理寺少卿爲龍圖閣學士爲待制爲吏部侍郎中閒一使金國兩提舉太平興國宮及爲吏部尙書又晉封潁川郡公而歸老於南澗因自號南澗翁併以名集南澗者一在建安城南爲鄭氏別業見本集詩序一在廣信溪南見書錄解題詳其南澗新居成建醮書詞似乎非建安之南澗當以廣信爲是也元吉本文獻世家據其跋尹焞手迹自稱門人則距程子僅再傳又與朱子最善嘗舉以自代



其狀今載集中故其學問淵源頗爲醇正其他以詩文倡和者如葉夢得張浚曾幾曾丰陳巖肖龔頤正章甫陳亮陸游趙蕃諸人皆當代勝流故文章矩矱亦具有師承其婿呂祖謙爲世名儒其子名澆字仲止者亦清苦自持以詩名於宋季蓋有由矣朱子語類云无咎詩做著者儘和平有中原之舊無南方啁嘶之音誠定評也集本七十卷又自編其詞爲焦尾集一卷文獻通考竝著錄歲久散佚今從永樂大典所載總哀爲詩七卷詞一卷

文十四卷統觀全集詩體文格均有歐蘇之遺不在南宋諸人下而湮沒不傳殆不可解然沈晦數百年忽出於世炳然發翰墨之光豈非精神光采終有不可磨滅者故靈物爲訶得以復顯於今歟

自鳴集六卷

永樂大典本

宋章甫撰考宋有二章甫一字端叔浦城人熙甯三年進士官至都官郎中著有孟子解義十四卷楊時爲作墓誌其文今載龜山集中一字冠之鄱陽人徙居真州自號易足居士卽撰此集者也甫



行事不概見惟張端義貴耳集有云張冠之名甫  
有文集十卷少從于湖交游案于湖乃張  
孝祥之別號豪放飄  
蕩不受拘羈淳熙間淮有三士舒之張用晦和之  
張進卿真之張冠之也據其所述可略見其爲人  
其以章爲張蓋刊本字譌耳又陸游入蜀記稱乾  
道六年八月二十八日同章冠之秀才甫登石鏡  
亭訪黃鶴樓故址則甫蓋舉秀才矣其集不見於  
宋史藝文志文淵閣書目雖有其名而傳本久絕  
其得見於世者惟名賢小集拾遺所載湖上吟一

首詩家鼎鑪所載寄荆南故人一首而已今檢永  
樂大典所收自鳴集詩句頗多其格律雖稍近江  
湖一派而骨力蒼秀亦具有研鍛之功觀其別陸  
游詩有人生相知貴知心道同何必問升沈之句  
謝韓元吉寄茶詩有別公宛陵今五春渴心何啻  
生埃塵之句次韻呂祖謙見寄詩有山林舊約都  
茫茫憶君著書看屋梁之句是其所與酬贈者皆  
一時俊傑之士故耳孺目染尙能脫化町畦自成  
杼軸頗爲不墜雅音謹哀次釐訂析爲六卷至雜



說三篇以禪家機鋒論道德仁義之旨援儒入墨  
是殆不得志於時者之肆志放言然其害理已甚  
今故附其說於集末而特加糾正以著其失焉

客亭類彙十五卷

永樂大典本

宋楊冠卿撰冠卿字夢錫江陵人宋史不爲立傳  
陳振孫書錄解題載有此集而亦不詳冠卿之始  
末故事蹟無可考見今以集中詩文參互考之劉  
季岑手帖云紹興初假守南徐楊君季洪爲理掾  
後三十年見其子夢錫則冠卿爲季洪之子其紀

夢詩序云戊戌年四十戊戌爲淳熙五年上推四  
十年則冠卿當生於紹興八年己未其與傅漕詩  
有鄉書憶昔獻賢能姓氏曾叨天府登句則嘗舉  
進士其上執政啟云奉命領州奪符而歸又有祭  
廣東主管衙土地文則嘗出知廣州以事罷職而  
姜夔贈冠卿詩有長安城中擇幽棲靜退不願時  
人知句則解官以後又嘗僑寓臨安者也其集世  
頗罕傳惟浙江採進書中有舊刊客亭類彙爲巾  
箱小字本檢勘尙係原刻分四六編雜著編古律



編皆所作詩文惠荅客亭書啟編則同時名人酬贈之作不標卷數前後亦無序跋而永樂大典各韻內所收冠卿之文尙有表牋詩餘各數十首皆刊本所未收疑當時本各自爲編流傳旣久遂有闕脫今據永樂大典所載以刊本參校搜緝補綴諸體始全謹仿原編名目釐爲十四卷而仍以書啟一卷附之冠卿才華清雋四六尤流麗渾雅張端義貴耳集載其掾九江戎司時趙溫叔罷相帥荆南道由九江守帥合宴冠卿作致語云相公倦

台鼎喜看繡袞之東歸潯陽無管弦且聽琵琶之舊曲溫叔再三稱道知其以是體擅長矣又京鏗何異李結諸帖極稱其集杜之工而橐中乃無一篇豈當時別本單行而今佚之耶

欽定四庫全書總目卷一百六十

南海譚懋安初校  
順德馮佐勛覆校



欽定四庫全書總目卷一百六十一

集部十四

別集類十四

石屏集六卷

浙江鮑士恭家藏本

宋戴復古撰復古字式之天台人嘗登陸游之門以詩鳴江湖間所居有石屏山因以為號遂以名集卷首載其父敏詩十首蓋復古幼孤勉承家學因搜訪其先人遺藁以冠已集昔黃庭堅山谷集後附刻其父伐檀集王楙野客叢書後附刻其父



野老紀聞復古以父詩爲數無多不成卷帙特升弁於簡端例雖小變理乃較協矣復古詩筆俊爽極爲作者所推姚鑛跋其詩稱其天然不費斧鑿處大似高三十五輩晚唐諸子當讓一面方回跋其詩亦稱其清健輕快自成一家雖皆不免稍過其實要其精思研刻實自能獨闢町畦瞿佑歸田詩話載復古嘗見夕照映山得句云夕陽山外山自以爲奇欲以塵世夢中夢對之而不愜意後行邨中春雨方霽行潦縱橫得春水渡傍渡句以對上

下始稱其苦心搜索卽此可見一端至集中嚴子陵釣臺詩所謂平生誤識劉文叔惹起虛名滿世閒者趙與虢娛書堂詩話極賞其新意可喜而羅大經鶴林玉露又深以其議論爲不然蓋意取翻新轉致失之輕佻在集中殊非上乘與虢所云回未足爲定評矣

蓮峯集十卷

永樂大典本

宋史堯弼撰堯弼字唐英眉州人其仕履不見於史傳焦竑國史經籍志載堯弼蓮峯集二十卷而



世閒亦無傳本故錄宋詩者多不能舉其姓名惟  
永樂大典載有是集原序二篇其一作於乾道丙  
戌自署曰省齋不知何人其一爲任清全序作於  
嘉定癸酉稱堯弼童丱卽迴出不凡少以古樂府  
洪範等論往見張浚浚謂其大類東坡留館於潭  
與張栻遊每開以正大之學歲丁丑偕其弟堯文  
登第云云而亦不言其所終考周密浩然齋雅談  
云李燾十八歲爲眉州解魁時第二人史堯弼方  
十四歲人疑其文未工赴鹿鳴宴猶著粉紅袴太

守命分韻賦詩堯弼得建字援筆立成云四歲尙  
少房元齡七步未饒曹子建後爲張魏公客不幸  
早世云云其所記與任清全序相合又江湖續集  
載張煒題蓮峯集詩一首亦有句云一梗江湖客  
三朝忠義家以諸書參互考證蓋堯弼登第後未  
授官而卒也堯弼天姿卓絕其詩縱橫排宕擺脫  
恆蹊其論策諸篇明白曉暢瀾翻不窮亦有不可  
羈勒之氣大抵有其鄉蘇氏之遺風惟其夏綠霜  
凋故不能如李燾之著書傳後然就其文章而論



要亦不失爲才士任清全序乃因集中有論學之作遂以張栻少年自得爲堯弼磨礪浸灌之功欲援而入於道學則門戶標榜之習轉不足以見堯弼矣其文在宋已多散落是集乃其從孫師道所重刻今亦不可復覩謹從永樂大典中掇拾裒輯釐爲十卷著之於錄俾懷才齎志之士無聲塵翳如之慨焉

江湖長翁文集四十卷

山東巡撫採進本

宋陳造撰造字唐卿高郵人淳熙二年進士官至

淮南西路安撫司參議遭宋不競事多齟齬自以爲無補於世置江湖乃宐遂號江湖長翁既不竟其用故無所表見而宋史亦不爲立傳惟元申屠駟爲作墓誌稱其於誨誘則良師於撫字則循吏身篤操修道兼體用雖金石之文稱述例多溢量亦未必純構虛詞也集中罪言一篇蓋仿杜牧而作不免紙上談兵徒爲豪語其文則恢奇排奐要亦陳亮劉過之流其他劄子諸篇多剴切敷陳當於事理記序各體錘字鍊詞稍傷真氣而皆謹嚴



有法不失規程在南宋諸作者中亦鐵中錚錚者矣至易說一卷始於无妄終於比凡十五篇疑其未完之書中多以史證經與楊萬里誠齋易說李光讀易詳說相類殆爲時事而發託之詁經歟其集久無刻本明崇禎中李之藻以淮南自秦觀而後惟造有名於時始與觀集同刻之於高郵云

燭湖集二十卷附編二卷

永樂大典本

宋孫應時撰應時字季和自號燭湖居士餘姚人登淳熙乙未進士初尉黃巖遷海陵丞再遷遂安

令改知常熟縣以倉粟流欠貶秩移判邵武軍未上而卒考楊簡作應時壙志及張浚會稽續志均稱其紹熙初嘗應蜀帥邱晝辟預料吳曦逆謀白晝以別將領其軍後曦以叛誅其言果驗時應時已歿三省奏官其子祖開蓋亦智略之士又史彌遠受業於應時集中與彌遠諸書皆深相規戒迨彌遠柄國獨超然自遠無所假借甘淪一倖而終其人品尤不可及矣宋史藝文志載燭湖集十卷據應時詩中自序蓋嘗應劉克莊之求手編其彙



爲五十卷集末有其姪祖祐跋稱涑水司馬述先以十卷付梓後附以問思錄五十條通鑑摘義三十條總名之曰經史說又附雪齋父子倡和詩及雪齋行狀墓銘楊簡所撰壙記會稽續志小傳子祖開補官省劄等篇是十卷爲祖祐所編非其舊本也年遠散佚久無傳本故厲鶚作宋詩紀事僅於吳禮部詩話王應麟困學紀聞黃宗羲姚江逸詩內採掇數篇寥寥不備茲從永樂大典所載排纂成編惟經史說殘闕特甚僅存一篇其餘則約

略篇數殆已十得八九以卷帙繁重分二十卷仍附編其父介及其兄應求應符詩並錄應時父子誌傳行狀子祖開補官省劄諸篇爲上下二卷應求字伯起嘗登鄉薦應符字伯潛所著有歷代帝王纂要二卷初學須知五卷載於陳振孫書錄解題今並未見云

昌谷集二十二卷

永樂大典本

宋曹彥約撰彥約有經幄管見已著錄是編稱昌谷集者考集中有與劉後溪書謂世爲都昌邨落



人後遷於城下昌谷巷則其所居地名也彥約初游朱子之門其後歷任州郡卻敵平寇獨卓有實用故宋史本傳稱其可以建立事功及八侍講筵亦能殫心啟沃其經幄管見一書敷陳祖訓規箴時政尙歷歷可稽文集乃湮沒不顯宋史藝文志皆不著錄惟焦竑國史經籍志有昌谷小集二十卷錢溥祕閣書目亦有曹文簡公集十五冊然亦久無傳本厲鶚宋詩紀事蒐羅繁富絕不及其姓名則無徵久矣今考永樂大典載彥約詩文頗多核

其篇目如本傳所稱爲利路轉運判官時所作病夫議爲兵部侍郎時所上薦李心傳劄子俱不載其中知己未免於佚闕然其餘諸作世所不傳者爲數尙夥謹類次排纂釐爲二十二卷其間奏議大都通達政體可見施行所論兵事利害尤確鑿有識不同摭拾游談其應詔陳言二封事乃慶元寶慶閒先後所上於當日苟且玩愒之弊反覆致意切中窾要亦可徵其鯁直之槩惟儷詞韻語稍傷質樸然不事修飾而自能詞達理明要非學有



原本者不能也

省齋集十卷

永樂大典本

宋廖行之撰行之字天民其先延平人五季時徙於衡州登瀛熙甲辰進士嘗官岳州巴陵尉以親老勾養而歸注授甯鄉主簿未赴據田奇所作行狀稱其生平內行修飭留心經濟入仕亦多著循績然名位不昌故姓字不著於史傳其所著作諸家亦罕著錄是集乃其子謙所刊原本十卷今從永樂大典中採掇哀輯篇帙頗夥似當日全部收

入謹排次審訂仍析爲十卷以還其舊其原跋十七通行狀墓銘等三首仍附於後以備考核其文章大抵屏除藻繪務以質樸爲宗或不免近於樸俶故戴溪作序不甚稱之然其詞意篤實切近事理亦足以想見其爲人至其四六之作則較他文爲流麗潛敷敬跋稱其表啟多互見周必大集中蓋以必大亦有省齋之名故相淆混今檢勘必大全集實無一篇與此相復當由後人知其誤載從而刊除矣



南軒集四十四卷

浙江鮑士恭家藏本

宋張栻撰栻字敬夫廣漢人丞相浚之子以蔭補官孝宗時歷左司員外郎除祕閣修撰終於荆湖北路安撫使事蹟具宋史道學傳栻歿之後其弟杓哀其故橐四巨編屬朱子論定朱子又訪得四方學者所傳數十篇益以平日往還書疏編次繕寫未及歲事而已有刻其別本流傳者朱子以所刻之本多早年未定之論而末年談經論事發明道要之語反多所佚遺乃取前所蒐輯參互相校斷

以栻晚歲之學定爲四十四卷併詳述所以改編之故弁於書首卽今所傳淳熙甲辰本也栻與朱子交最善集中與朱子書凡七十有三首又有荅問四篇其閒論辨斷不少假借如第二札則致疑於辭受之閒第三札辨墓祭中元祭第四札辨太極圖說註第五六七札辨中庸註第八札辨游酢祠記第十札規朱子言語少和平第十一札論社倉之弊責以偏袒王安石第十五札辨胡氏所傳二程集不必追改戒以平心易氣第二十一札



辨論仁之說有流弊第四十四札論山中諸詩語  
未和平第四十九札論易說未安是從來許多意  
思未能放下第五十四札規以信陰陽家言擇葬  
地與胡季隨第五札又論朱子所編名臣言行錄  
未精細朱子竝錄之集中不以爲忤又棧學問淵  
源本出胡宏而與朱子第二十八札謂胡寅讀史  
管見病敗不可言其中有好處亦無完篇又第五  
十三札謂胡安國春秋傳其閒多有合商量處朱  
子亦竝錄之集中不以爲嫌足以見醇儒心術光

明洞達無一毫黨同伐異之私後人執門戶之見  
一字一句無不回護殊失朱子之本意至朱子作  
張浚墓誌本據棧所作行狀故多溢美語錄載之  
甚明而編定是集乃削去浚行狀不載亦足見不  
以朋友之私害是非之公矣論張浚者往往遺議  
於朱子蓋未核是集也劉昌詩蘆浦筆記駁棧堯  
廟歌指堯廟在桂林失於附會其歌今在集中蓋  
取其尊崇帝德而略其事實昌詩又錄棧愨齋銘  
稱棧奉其父命爲其弟杓作本集不載檢之良然



欽定四庫全書目錄卷一百二十一  
然棧集卽杓所輯不應反漏考高斯得恥堂存橐  
有南軒永州諸詩跋曰劉禹錫編柳子厚集斷至  
永州以後少作不錄一篇南軒先生永州所題三  
亭陸山諸詩時方二十餘歲興寄已落落穆穆如  
此然求之集中則咸無焉豈編次者以柳集之法  
裁之乎然則棧集外詩文皆朱子刪其少作非偶  
佚矣

勉齋集四十卷

編修勵守  
謙家藏本

宋黃榦撰榦字直卿號勉齋閩縣人少受業於朱

子朱子以女妻之甯宗朝補將仕郎歷知漢陽軍  
安慶府以主管亳州明道宮致仕卒諡文肅事蹟  
具宋史道學傳是集講義經說三卷雜文三十六  
卷詩一卷雜文凡守郡公移案牘之辭皆在焉據  
其卷目與宋史藝文志相合蓋猶原本也昔朱子  
作竹林精舍成嘗遺榦書有他時便可請直卿代  
卽講席之語榦亦能堅守師說始終不貳然林栗  
與朱子論易不合至構釁攻擊朱門弟子有欲火  
栗之書者榦祭栗文獨能不沒其所長可謂絕無



門戶之見又史稱榦在安慶府築城部署有方民  
不勞而事集及金兵大至淮東西震恐獨安慶按  
堵如故又在制置李珣幕中力以軍政不修邊備  
廢弛爲言珣不能用厥後光黃繼失卒如其言尤  
非朱學末流空談心性者可比亦足見洛閩設教  
之初尙具有實際不徒以峩冠博帶刻畫聖賢矣  
其文章大致質直不事雕飾雖筆力未爲挺拔而  
氣體醇實要不失爲儒者之言焉

北溪大全集五十卷外集一卷

編修汪如藻家藏本

宋陳淳撰淳有北溪字義已著錄其生平不以文  
章名故其詩其文皆如語錄然淳於朱門弟子之  
中最爲篤實故發爲文章亦多質樸真摯無所修  
飾元王環翁序以爲讀其文者當如布帛菽粟可  
以濟平人之飢寒苟律以古文律度聯篇累牘風  
形露狀能切日用乎否云云是雖矯枉過直之詞  
要之儒家實有此一派不能廢也又淳以朱子終  
身與陸九淵如水火故生平大旨在於力申儒釋  
之辨以鍼砭金谿一派之失集中如道學體統等



四篇似道似學二辨皆在嚴陵時所作反覆詰辨  
務闡明鶯湖會講之緒論亦可謂堅守師傳不失  
尺寸者矣集爲其子渠所編末有外集一卷載奠  
祭文誌銘敘述五篇亦渠所輯附淳祐戊辰郡倅  
薛季良爲錢版龍溪書院歲久散佚元至元乙亥  
明宏治庚戌又兩經翻刻今所傳者蓋猶宏治本  
云

山房集九卷

永樂大典本

宋周南撰南字南仲吳郡人淳熙庚戌登甲科官

至祕書省正字再以薦入詞館皆不久罷去遂以  
殿廷所授文林郎終焉藝文志有周南山房集五  
卷陳振孫書錄解題則稱周氏山房集二十卷後  
集二十卷卷目多寡迥異今檢永樂大典所載有  
題山房集者亦有題山房後彙者與陳氏著錄之  
本合知宋志五卷之目乃傳寫脫譌不足據也惟  
計永樂大典所錄篇帙無幾當由刪雜太甚故佚  
去者多今但就其存於今者各依原目釐爲前集  
八卷後彙一卷以略存其舊南長於四六以俊逸



流麗見稱制誥諸篇尤得訓詞之體其初入館也  
葉適實薦之考吳子良荆溪林下偶談有云開禧  
用兵韓侂胄欲以葉適直學士院草詔適謝不能  
既而衛涇被命草詔云百年爲墟誰任諸人之責  
一日縱敵遂貽數世之憂涇見適舉似誤爲墟爲  
成墟他日周南至適告以涇文字近頗長進然成  
墟字可疑南愕然曰本爲墟字何改也適方知南  
實代作因薦其宐爲文字官遂召試館職蓋卽其  
事案此四語今在南所作秦檜降爵易諡敕中則

當時已載入已集足徵其不能割愛而敕內別有  
兵於五材誰能去之臣無二心天之制也數語亦  
極爲王應麟所激賞是其織組之工膾炙人口尤  
可以概見矣集中又有諸書題跋二十餘則與館  
閣續書目體例相近疑亦在館校勘時所作又雜  
記數十條多述宋代故事閒或直錄古書之文無  
所論斷疑本別有說部附於集內而爲永樂大典  
所割裂今無可參證姑仍其原文錄之云

橘山四六二十卷

浙江鮑士  
恭家藏本

欽定四庫全書總目卷一百六十一

集部

別集類十四

十四



宋李廷忠撰廷忠字居厚橘山其號也於潛人淳熙八年進士歷無爲教官旌德知縣終於夔州通判宋史無傳厲鶚作宋詩紀事載所著有洞霄詩集今亦不傳惟是編尙存明萬歷中丹陽孫雲翼爲之箋註雲翼自序稱所藏原係鈔本甲申應貢之京師偶攜是帙遂取繙閱隨手箋釋後隨牒炎徼左僻多暇爰取訂正稍加詮次云云蓋向無刊版自雲翼箋釋後始授梓行世也廷忠名位不顯故集中啟劄爲多大抵候問酬謝之作而第十四

卷內乃皆賀正賀至箋表中有乘輅護漕等語與廷忠仕履不合必非其所自爲案洪邁容齋四筆稱宋時所在州郡相承以表奏書啟委教授因而餉以錢酒則此必廷忠爲教官時代州守及憲臣所作特原本未及註明遂不可辨耳北宋四六大都以典重淵雅爲宗南渡未流漸流纖弱廷忠生當淳熙紹熙之間正風會將變之時故所作體格稍卑往往好博務新轉傷繁冗然織組尙爲工穩其佳處要不可掩固當存之以備一家至雲翼箋



註尤多蕪雜未足以資考核以其裒綴頗勤故姑仍舊本錄之不復刊削焉

後樂集二十卷

永樂大典本

宋衛涇撰涇字清叔華亭人徙居崑山登淳熙十一年進士第一王楙野客叢書所謂潮至夷亭出狀元甲辰衛涇果魁天下者也累官參知政事封秦國公卒諡文節其事蹟不具於宋史惟南宋翰苑題名記載涇以開禧二年七月官中書舍人兼修玉牒官直學士院十月除吏部侍郎兼侍讀二

年十月除禮部尙書十一月除御史中丞宋史宰輔表載開禧三年十一月丙戌涇自中奉大夫試御史中丞除端明殿學士簽書樞密院事丁亥兼權參知政事十二月壬戌涇與雷孝友同除參知政事嘉定元年六月乙亥罷爲資政殿學士知潭州而集中謝表自潭州以後又嘗一知福州再知隆興府其歷官歲月尙可考見涇初號拙齋居士改號西園居士後築堂成取范仲淹岳陽樓記中語題之曰後樂堂遂以自號并名其集原本凡七



十卷乃其子樵所編嘗刻之於永州歲久亡佚明  
楊樞澂故述僅著其名而其本已不可見今從永  
樂大典中哀輯編次釐爲二十卷衛氏在宋世以  
文學知名涇諸父膚敏紹興閒爲禮部侍郎立朝  
頗著風采涇弟湜亦湛深經術所著禮記集說已  
別著錄涇所作大都和平溫雅具有體裁歸有光  
震川集稱其文章議論有裨當世當韓侂胄用事  
時隱居十年於所居石浦闢西園堅臥不出其進  
退之際蓋能以禮自守者今卽集中諸奏疏考之

其應詔論北伐劄子謂兩國相敵持重者安輕動  
者危應兵常勝首事常沮力詆侂胄開釁之非詞  
意極爲切直其劾易祓朱質林行諸狀亦能抵觸  
姦佞侃侃不阿他所論列竝中窾要在當時可稱  
正人特其執政未久宋史又佚而不傳其大節幾  
就湮沒幸而遺文復顯猶得據以見其仕履之大  
略故著之於錄補史文所未及焉

竹齋詩集三卷附錄一卷

兩淮馬裕  
家藏本

宋裘萬頃撰萬頃字元量新建人淳熙十四年進



士歷官大理寺司直請外任添差江西撫幹楊簡誌其墓以默識稱之陳宏緒寒夜錄稱萬頃在當時與胡桐原萬澹菴徐竹堂往來倡和號爲四傑今三人俱已湮沒惟萬頃集存劉克莊後邨集有裘元量司直詩跋稱其標致高勝有顏氏之臞龔生之潔又稱其猶子南昌理掾應材攜竹齋遺墨古律詩三首其季元齡又手錄四十二首其言若近而遠若淡而深近而淡者可能遠而深者不可能爲人自貴重恥表襮惟詩亦然世知竹齋者多

而見其詩者絕少理掾盍澂諸梓與同志共之云云則元量之詩克莊時尚無專集此本爲康熙己丑其裔孫錦縣知縣奏所刊凡詩三卷末一卷附錄誥敕誌銘不知何人所編近時工部尙書裘曰修又重刊之曰修亦萬頃裔也其詩雖風骨未高而清婉有餘不染江湖之濫派趙與虬娛書堂詩話嘗稱其歸興一篇又稱其初官樂平印曹與洪邁詩篇往來邁最推其雲歸青嶂雨初歇花臥碧苔春已休之句云



華亭百詠一卷

浙江鮑士  
恭家藏本

宋許尚撰尚自號和光老人華亭人其始末無考是編作於淳熙閒取華亭古蹟每一事爲一絕句題下各爲註然百篇之中無註者凡二十九而其多有非註不明者以例推之當日不容不註殆傳寫佚脫歟弔古之詩大抵不出今昔之感自唐許渾諸人已不能拔出窠臼至於一地之景衍成百首則數首以後語意略同亦固其所厲鶚作宋詩紀事僅錄其陸機茸三女岡征北將軍墓顧亭

林白龍洞僦塘普照寺陸瑁養魚池唳鶴灘湖光亭十首亦以其罕逢新警故也然格意雖多複衍而措詞修潔尚不失爲雅音所註雖簡略而其時在今五六百年之前舊蹟猶未全湮方隅之所在名目之所由亦尚足備志乘之參考在詩家則無異於眾人在輿記之中則視後來支離附會者勝之多矣

梅山續彙十七卷

浙江鮑士  
恭家藏本

宋姜特立撰特立字邦傑麗水人父綬靖康中殉



難南渡後蔭補承信郎孝宗召爲太子春坊累官  
浙東馬步軍副總管慶遠軍節度使事蹟具宋史  
佞倖傳陳振孫書錄解題載梅山稟六卷續稟十  
五卷列之詩集類中則兩集皆有詩無文此本出  
休甯汪森家附以雜文及詩餘共爲十七卷不知  
何人所增輯森序稱其流傳絕少故繕寫以傳則  
亦罕覲之本其正稟六卷藏書家皆不著錄意其  
散佚已久矣特立在當時特光宗藩邸之舊頗攬  
權勢屢爲廷臣所糾其人殊不足道陳振孫稱其

本一士人塗轍一異儼然誓御之態蓋惜之也然  
論其詩格則意境特爲超曠往往自然流露不事  
雕琢同時韓元吉陸游皆愛之亦有由矣其上梁  
文引自述其生平最悉有云百首之清詩夜上九  
重之丹詔晨頒今考此集所載皆官春坊以後之  
作而所云百首者集中不載或在所佚之數  
歟

信天巢遺稟一卷附林湖遺稟一卷江邨遺稟一卷疎

寮小集一卷

浙江巡撫  
採進本



宋高翥撰翥字九萬號菊磻餘姚人孝宗時游士  
也有菊磻集二十卷久佚不存至

國朝康熙二十六年其裔孫士奇於徐乾學家宋槧  
書中採得遺詩一百九首益以家藏二十二首又  
於他集中得十三首續得朱彝尊宋刻江湖集所  
載四十七首刪除重複共得詩一百八十九首刻  
之題曰信天巢遺藁信天巢者翥所以名其居也  
然卷前元貞元年姚燧序本稱曰菊磻集不知何  
以改名也後附林湖遺藁一卷爲翥姪鵬飛字南

仲者所撰又附江邨遺藁一卷則翥父選叔邁之  
詩選邁皆紹興閒登第選官武當軍節推邁官縣  
尉此卷之中又附質齋遺翁二人之詩則高氏譜  
中所載僅存其號卽士奇亦莫能舉其名矣最後  
附高似孫疎寮小集一卷似孫卽撰緯略者文獻  
通考載疎寮集三卷此所刻甚少尙有他選所有  
而此刻無之者是集在宋頗著稱陳振孫書錄解  
題謂其作文怪澀詩猶可觀劉克莊後邨詩話謂  
其詩能參誠齋活句不知此刻何以採輯轉不完



備然士奇後序中初未言及附刻疎寮集疑為士  
奇後人所加更不暇博採歟

欽定四庫全書總目卷一百六十一

南海譚懋安初校  
順德馮佐助覆校



九千